



BILTEN

OPĆINE SREBRENİK



CERTIFIKAT ZA BEZOPASNOŠĆU
BIBLIJE 1978/85



IZDAJE: OPĆINA SREBRENİK • BROJ: 29 • MJESEC: OKTOBAR/LISTOPAD 2009. • BILTEN JE BESPLATAN • TIRAŽ 500



Foto: Svjetlan Bešić

Saradnja ambasade Libije i općine Srebrenik

Moguć nastup konzorcija srebreničkih firmi u Libiji



Naši predstavnici u ambasadi Libije u BiH

Dana 15.07.2009. godine, općinu Srebrenik je posjetio ambasador Libije u Bosni i Hercegovini, Ayad S.S. Shawish. Razlog posjete bio je upoznavanje sa prirodnim i privrednim potencijalima općine Srebrenik te razgovori o mogućem nastupu domaćih firmi na tržištu Libije, kao i mogućnost ulaganja Libije u razvoj infrastrukture općine Srebrenik. Ambasadora su u kabinetu načelnika primili načelnik Osman Suljagić i njegovi saradnici, nakon čega je održan i sastanak sa privrednicima u Plavoj sali Doma kulture. Na sastanku sa privrednicima razgovaralo se o mogućnosti formiranja konzorcija građevinskih firmi i njihovog nastupa na libijskom tržištu. - Naša posjeta ima za cilj da podržimo i ohrabrimo privrednike sa ovog općinskog područja i da im pružimo ruku za saradnju. Veliko mi je zadovoljstvo da ja kao ambasador Libije u BiH vidim bh. kompanije na libijskom tržištu, jer uspjeh bh. firmi u Libiji je i moj lični uspjeh. U Libiji ima mnogo posla za gotovo sve firme, posebno iz oblasti nisko-gradnje kao i visokogradnje, ali ponavljam da jedino kao konzorcij možete konkurisati. Udružite se i

konkurišite na libijsko tržište. Samo jedinstveni i ujedinjeni kao konzorcij možete ravnopravno konkurisati na libijskom tržištu. Predsjednik Muamar Gadafi je kazao kako će bh. firme na libijskom tržištu imati prioritet, poručio je ambasador Libije u BiH, Ayad S.S. Shawish privrednicima sa područja općine Srebrenik. Naime, Libija nakon ukidanja embarga namjerava uložiti blizu 150 milijardi eura u obnovu svoje infrastrukture. Firmama iz BiH će se dati prednost pri nastupu na ovom tržištu, te se ambasador nada da bi bh. firme mogle uzeti bar 5% vrijednosti posla koji se namjerava realizovati. Obzirom da su u Libiji već dobile posao neke bh. firme (Širbegović, Energoinvest...), postoje preduslovi da i srebrenički konzorcij uspješno nastupi na ovom tržištu. Nakon sastanka, učesnici su pogledali promotivni 15-minutni film, u kojem su istaknuti turistički i privredni potencijali općine Srebrenik. Generalno sada je sve na privrednicima, koji bi trebali da se ujedine i pokušaju da zajednički nastupe na ovome izuzetno zanimljivom ali i zahtjevnom tržištu. Nakon toga gosti su posjetili Stari grad Srebrenik i planinu Majejicu. Dana 14.10.2009. godine, općinski

načelnik Osman Suljagić te privrednici: Hazim Muratović, Adem Musić, Ramiz Karić i Taib Joldić su, na poziv libijskog ambasadora, uzvratili posjetu ambasadoru Libije u Sarajevu. Tokom posjete se razgovaralo o konkretnim aktivnostima na obrazovanju konzorcija srebreničkih firmi i njihovog eventualnog zajedničkog nastupa na libijskom tržištu. Općinski načelnik je ambasadoru Shavishu, nakon kratkog predstavljanja prirodnih i privrednih potencijala općine Srebrenik, iskazao zahvalnost za pomoć u realizaciji skore posjete delegacije općine Srebrenik i naših privrednika Libiji, koja se ogleda u smislu obezbjeđenja viza i ostale potrebne dokumentacije, kao i kontakt osoba iz oblasti privrede i određenih ministarstava, koje bi naše predstavnike uskoro trebala dočekati u Tripoliju, te biti im domaćini. Iz razgovora sa našim privrednicima saznali smo da je najbliža realizaciji ugovora srebrenička firma «Voćni rasadnik», obzirom na ogromne mogućnosti koje se istoj pružaju na libijskom tržištu. Na prijedlog ambasadora, obavljen je i razgovor



Sa dočeka libijskog ambasadora

sa menadžericom jedne internacionalne kompanije, koja je u radnoj posjeti BiH, a koja u ime libijskog ministarstva zdravlja vrši odabir zdravstvenih radnika (medicinskih sestara i tehničara) za angažman i rad u libijskim bolnicama. Uskoro bi ta menadžerica trebala posjetiti Srebrenik te izabranim radnicima ponuditi potpisivanje trogodišnjeg ugovora o radu u Libiji.

SJEDNICE OPĆINSKOG VIJEĆA

Sa 9. sjednice OV Srebrenik



Sa 9. sjednice OV-a Srebrenik

Na inicijativu Policijske stanice Srebrenik, predstavnici zakonodavne vlasti Općine Srebrenik prihvatili su, na 9. sjednici OV-a, primjedbu da se u Odluku o javnom redu i miru uvrsti i zabrana točenja i konzumiranja alkoholnog pića u čitaonicama, prodavnicama i mjesnim zajednicama. Onaj trgovac odnosno uposlenik koji omogućiti točenje i konzumiranje alkohola, bit će kažnjen novčanom kaznom od 200 do 600 KM. Na ovoj sjednici OV također je odobrena saglasnost Općinskom pravobranilaštvu da naplati dug od d.o.o. „Cobra“ Srebrenik u iznosu od 124.554 KM koji je nastao zbog preuzimanja dugovanja firme d.o.o. „Gradnja“ Srebrenik, a koja je ugašena, dok su vijećnici odobrili i 4.544 KM za neprevidene i dodatne radove na nogometnom stadionu u Sladnoj, a koje izvodi firma d.o.o. „Nerhas“ NN Luka. Nakon što je na prethodnoj sjednici OV Srebrenik vraćen Izvještaj o radu Sportskog saveza za 2008. godinu, ovoga puta pred vijećnicima se našao potpuni, koji je uz nekoliko primjedbi i usvojen. Najviše primjedbi bilo je na slabo apliciranje prema višim nivoima kako bi se dobilo više finansijskih sredstava, dok je naglašeno i to da se N.K. Gradina treba vratiti nekadašnji ugled, kako bi ovaj klub ponovo bio član Prve lige FBiH. Usvojena je i informacija o stanju u oblasti poljoprivredne proizvodnje, gdje je direktor Poljoprivrednog zavoda TK Nusret Šerifović naglasio kako se Srebrenik nalazi u samom vrhu ljestvice kada je u pitanja poljoprivredna proizvodnja na području TK, a za još bolje rezultate potrebno je jačati kadrovsku službu u Općini Srebrenik. Pojedini vijećnici su se osvrnuli i na slabu podršku države u oblasti podsticaja iz mljekarstva te kukuruza, zbog čega treba apelirati višim nivoima vlasti. U informaciji o socijalnom statusu korisnika boračko-invalidske zaštite, vijećnici su primjedovali na račun Biroa, s obzirom da ova populacija gubi pravo na zdravstvenu zaštitu ako se ne javi na vrijeme na Biro, dok se u informaciji o položaju raseljenih i izbjeglih lica

najviše govorilo o nasljeđivanju objekata u kojima su boravila ova lica, koja bi kasnije mogli koristiti socijalno ugrožena lica. Imenovana je i Komisija za utvrđivanje prometne vrijednosti nepokretnosti i prava, a za njenog predsjednika imenovan je Jusuf Mehuljić, dok su članovi Mirza Ibrišimović, Svjetlan Bešić, Mustafa Pedljić te Rifat Moranjkčić.

Izvršenje budžeta za šest mjeseci 82%

Na 10. sjednici Općinskog vijeća Srebrenik, koja je održana 29.08.2009.godine, Jakub Suljkanović, šef Službe za budžet, poduzetništvo nadzor i općine Srebrenik, je kazao kako je izvršenje budžeta za prvih šest mjeseci 82%, što se smatra dosta dobrim ako se uzme u obzir recesija, a rebalans će biti izvršen na narednoj sjednici u septembru. Uprkos tome vijećnici SDPa- su glasali protiv njegovog izvršenja, no s obzirom da nisu imali većinu, on je ipak usvojen, uz sugestiju Stručne komisije koja je naglasila, da treba aktivirati inspeksijske službe u vezi naplate potraživanja kako bi se bolje punio budžet, da se uskladi dinamika trošenja sa dinamikom priliva kako ne bi došlo do većeg deficita, te da se smanje izdaci za materijal i usluge. Dosta pažnje izazvala je Informacija o radu Općinskog suda u Gradačcu, gdje se istakao veliki problem utvrđivanja prava vlasništva, tj.upisivanja nekretnina u grunt, zbog čega se čeka i po nekoliko godina. Iz tog razloga će OV uputiti primjedbu za izmjenu zakona Federalnom ministarstvu pravde. Na sugestiju načelnika Općine Osmana Suljagića, tačka o Programu obavljanja komunalne potrošnje vraćena je na doradu s obzirom na veliki broj sugestija, dok su bez većih rasprava usvojene tačke o pristupanju izrade urbanističkog projekta „Spahijina njiva“ i Odluka o komunalnim djelatnostima. Poslije velike rasprave vijećnici su ipak usvojili i prihvatili informaciju u vezi izgradnje regionalne deponije, s obzirom da je supotpisnik ovog projekta kao i većina općina sa područja TK, iako je riječ o projektu koji je propao. Istaknuto je i veliko nezadovoljstvo odnosom Turističke zajednice TK prema Općini Srebrenik, a zbog zakonskih osnova nije udovoljen zahtjev Udruženja privrednika za osnivanje općinske turističke zajednice. Ipak je prihvaćeno da se osnuje info-pult u Srebreniku čime bi se trebao napraviti kakav-takav pomak u ovoj oblasti. U informaciji o stanju fizičke kulture i sporta naglašen je nemaran odnos privrednika prema N.K.Gradini, koja je prepuštena samo Općini, koja za sada jedina skrbi o ovom nogometnom klubu. U informaciji o stanju bezbjednosti za prvih šest mjeseci, vijećnici su najviše primjedovali na problem prosjačenja, a komandir PS Srebrenik Edin Karić je kazao kako policija nije u mogućnosti da riješi ovaj problem sama, pri čemu je pozvao građane da ignorišu prosjake, kako to čine npr. u Sloveniji, što je jedini način da im se stane u kraj. Također, prvi čovjek Policijske stanice u Srebreniku, zatražio je pomoć od OV i Udruženja privrednika u kupovini dva policijska vozila.

Obilježeni "Dani otpora općine Srebrenik"

U okviru manifestacije «Dani otpora općine Srebrenik», Planinarsko društvo «Majeвица» i Unija veterana Srebrenik organizirali su pohod na planinu Majevicu pod nazivom «Putevima pobjede». Nakon polaganja cvijeća na centralno spomen-obilježje šehidima i poginulim borcima, oko 40 ljubitelja prirode prepješalo je stazu Donji Potpeć-Gornji Potpeć-Brezik-Zahirovići-Lipici. Pješaćenje stazom dugačkom preko 10 kilometara organizirano je u znak



sjećanja na ratne događaje iz juna 1992. godine na lokalitetu Potpeća, kada je, nakon akcije srebreničkih boraca, Srebrenik postao jedna od rijetkih bh. općina čija je cijela teritorija bila potpuno slobodna. Srebreničkim planinarima pridružili su se i članovi Omladinske organizacije «Link» Srebrenik koji su na istoj stazi organizirali biciklijadu. Dana 18.06.2009.godine, u sklopu aktivnosti obilježavanja Dana otpora 2009 i 21. juna- Dana općine Srebrenik, u Plavoj sali Doma kulture u Srebreniku održan je okrugli sto na temu „Da se ne zaboravi“. Načelnik općine Srebrenik Osman Suljagić je na početku manifestacije pozdravio sve prisutne, a posebno predstavnike boračkih organizacija sa područja ove općine, domaćine okruglog stola, i zaželio im uspješan rad na evociranju i dokumentovanju događaja iz prošlog odbrambeno-oslobodičlačkog rata, a nakon njega oko 30 prisutnih su imali priliku čuti izlaganja Mustafić Zehrudina, ratnog načelnika Štaba TO Srebrenik, Bajraktarević Mehmeda, ratnog načelnika općine



Sa završne manifestacije Dani otpora 2009

Srebrenik te prof. dr. Mutapčić Edina. U suštini cilj okruglog stola i jeste da se konstantnim i dokumentovanim predstavljanjem i pojašnjavanjem događaja iz proteklog rata sa našeg općinskog područja, od strane tadašnjih najodgovornijih ljudi i historičara, pokuša otrgnuti od zaborava jedan segment naše historije. Kako je istaknuto na okruglom stolu, mlada generacija zna vrlo malo o ovom dijelu naše historije, ovom segmentu se pridaje nedovoljna pažnja u školi,

naš odnos prema izgrađenim spomen obilježjima i herojima koji su dali svoj život za BiH, je najblaže rečeno neadekvatan i to se mora mijenjati, a ovakvi i drugi slični skupovi i služe u tu svrhu. Na završnom skupu manifestacije „Dani otpora općine Srebrenik“, koji je održan u prepunoj Plavoj Sali Doma kulture, nakon prigodnih referata, zaslužnim pojedincima i kolektivima te najboljim iz sportskih natjecanja, koja su održana povodom Dana otpora, su dodijeljena priznanja.



Prisutni na manifestaciji Dani otpora 2009

Na Ratišu otkrivena spomen-ploča

Dana 25.07.2009.godine, na prigodan način je obilježen Dan formiranja borbenih jedinica sa područja srebreničkog naselje Duboki Potok. Program je započeo u 9 sati okupljanjem pripadnika jedinica ispred škole u D. Potoku, nakon čega je položeno cvijeće i proučena fatiha na spomenik šehidima u D. Potoku. Po završetku ovih aktivnosti nekoliko stotina bivših boraca i mještana učestvovalo je u maršu D. Potok-Drenovac-Zmajevac-Ratiš, gdje je upriličen i obilazak bivših linija odbrane u blizini naselje Smoluća. Nakon toga je na brdu Ratiš kod Lovačkog doma, na mjestu gdje je bila smještena komanda Odreda TO Srebrenik, koja je, u periodu od 15. aprila do 30. avgusta 1992. godine, rukovodila borbama za odbranu teritorije općine Srebrenik iz pravca Smoluće, a u kojima je život izgubilo 56 pripadnika ARBiH, otkrivena Spomen-ploča. Istu su zajednički otkrili općinski načelnik Osman Suljagić, te predstavnik bivših boraca i porodica poginulih boraca, nakon čega su se prisutnima, osim načelnika Suljagića, obratili i Nedret Zahirović, predsjednik MZ D. Potok, Enad Taletović, predsjed-



Otkrivanje spomen-ploče na Ratišu

nik MZ Cage te Emin Likić, predsjednik Građevinskog odbora za izgradnju Spomen-ploče i ratni komandant sa ovog područja. Istog dana na stadionu NK „Ingram“ iz Dubokog Potoka održan je memorijalni turnir „Osman Salkić“, dok su narednog dana odigrane polufinalne i finalna utakmica ovog turnira. Prva je ekipa domaćina NK „Ingram“ iz D. Potoka, koja je u finalnoj utakmici, nakon regularnih

0 : 0, pobijedila na penale ekipu NK „Mramor“ iz istoimenog mjesta rezultatom 4 :3, dok treće mjesto zauzela ekipa NK „Gradina“ iz Srebrenika, koja je rezultatom 1 :0



Proučena je fatiha i položeno cvijeće na spomen-obilježje šehidima u D. Potoku

pobijedila ekipu NK „Mladost“ iz Tinje. Za najboljeg igrača turnira je proglašen Delić Zlatan, golman NK „Ingram“ D. Potok. Glavni sponzor turnira je Hazim Bašić, direktor firme „Ingram“ Srebrenik, dok je ovom prilikom Reuf Jahić, naš sugrađanin koji već duže vrijeme živi i radi u Švedskoj, NK „Ingram“, uručio sportsku opremu i nekoliko lopti, te obećao besplatan smještaj kod njega kompletnoj ekipi ovog tima, ukoliko se isti odluče za sportske pripreme u Švedskoj.



Spomen-ploča kod Lovačkog doma na Ratišu

U put i kanalizaciju kroz naselje Luka 570.000 KM



Sanirana je izuzetno oštećena dionica reg. puta

Radnici firme «Reveus» iz Lukavca, nakon višemjesečnih radova, krajem septembra 2009.g. završili su gotovo sve radove na proširenju i rekonstrukciji dijela reg. puta Srebrenik-Orahovica-Gračanica, na dionici od mosta u naselju Luka do raskrsnice na skretanju za naselje Brničani. U okviru projekta,

na dionici puta u dužini od 504 metra, asfaltiran je put i trotoari, a proširen je kolovoz na minimalno 5,5 metara, čime su otklonjena «uska grla» u odvijanju saobraćaja na ovom frekventnom putnom pravcu. Prema riječima Berisa Jašarevića, rukovodioca gradilišta, i pored nezaobilaznih problema oko rješavanja

imovinsko-pravnih odnosa sa vlasnicima zemljišta, gdje je trebalo doći do proširenja puta, što je i usporilo radove, na pojedinim opasnim krivinama širina kolovoza iznosi i do 9 metara, a urađeni su i brojni potporni zidovi, pješačka staza i kolektor za odvodnju površinskih voda. Vrijednost radova, koji bi se u potpunosti trebali okončati do trenutka izlaska iz štampe ovog Biltena, iznosi preko 470.000 KM, a sredstva su osigurali općina Srebrenik i Direkcija za puteve Tuzlanskog kantona. Uporedo s rekonstrukcijom kolovoza, obavljani su i radovi na postavljanju podzemnih instalacija za javnu rasvjetu te izgradnji kanalizacije za dio naselja Luka. Vrijednost ovih radova je oko 100.000 KM, a sredstva je iz budžeta osigurala općina Srebrenik.



Sa rekonstrukcije reg. puta

Asfaltiran dio ulice Ivana Markovića Irca



Za asfaltiranje dijela ulice Ivana Markovića Irca 25.000 KM

Dana 12.08.2009. godine, polaganjem završnog asfaltnog sloja, radnici firme „Stenlir“ d.o.o. Živinice su završili radove na modernizaciji dijela ulice Ivana Markovića Irca u C. Srebrenika, odnosno jednog njenog kraka pored zgrada zv. Sekvoja i Poljostroj. Radi se o dionici dugoj preko 100m, prosječne širine oko 5m, za čiju je izgradnju iz budžeta općine Srebrenik izdvojeno 25.000 KM. Na ovaj način je i ova ulica dobila znatno savremeniji izgled. Za naredne godine predviđeni su radovi i na modernizaciji puta za Čehaje, pored bivšeg Poljostroja.

Za infrastrukturu u MZ Donji Srebrenik 470.000 KM

Simboličnim presijecanjem vrpce, dana 08.08.2009.godine, Osman Suljagić, načelnik općine Srebrenik, Zijad Hodžić, predsjednik MZ Donji Srebrenik i Nusret Šerifović, predstavnik Ministarstva poljoprivrede i vodoprivrede TK, pustili su u saobraćaj novi asfaltni put u ovom naselju, u šta je od samog početka bilo aktivno uključeno preduzeće „Vodovod i kanalizacija“ Srebrenik. Nakon toga svečano je obilježen i završetak radova na izgradnji sistema vodosnabdijevanja u ovom naselju. U asfaltiranje lokalne putne mreže i izgradnju vodovodnih postrojenja uloženo je 470.000 KM, a sredstva su osigurali općina Srebrenik, mještani i brojni donatori.



Sa ceremonije otvorenja puta u D. Srebreniku

Za asfaltni put kroz NN Neum 356.000 KM

Nakon što je prethodnih mjeseci urađena kvalitetna priprema podloge i odvodnje površinskih voda, izvođač radova, firma „ITK Musić“ d.o.o. Srebrenik je, početkom jula 2009. godine, asfaltirala put kroz srebreničko naselje „Neum“. –Ukupno je asfaltirano oko 1300m puta, od čega je 270 metara puta širine 5m, 405 metara puta širine 4,5 m, dok su asfaltirani i krakovi lokalnih ulica širine 3m u dužini od oko 623m. Ukupna vrijednost projekta je oko 356.000 KM, od čega su mještani platili 30% dok su ostalo sredstva iz budžeta. Obzirom na svu specifičnost terena koje je podložno klizištu bilo je i dodatnih radova -ističe dipl. ing. građ. Sead Zejnilagić, šef navedenog radilišta. U međuvremenu općina Srebrenik uradila i projekat sanacije nestabilne padine, za čiju je potpunu realizaciju potrebno preko 2 miliona KM, te krenula u realizaciju projekta odvodnje površinskih voda te zabijanje šipova, kako bi se smanjila opasnost od klizišta, koje prijete ovom području. U navedene radove do sada su utrošena značajna sredstva, tako da će ovo naselje, nakon završetka svih navedenih aktivnosti biti jedno od najmodernijih u Srebreniku.



Zvanično otvorena ulica Tuzlanskog odreda

Nakon što su, asfaltiranjem trotoara i ulice Tuzlanskog odreda, sredinom aprila 2009. godine privedeni kraju svi radovi na rekonstrukciji ove veoma važne saobraćajnice u gradu Srebreniku, dana 20.06.2009. godine, u sklopu aktivnosti na obilježavanju 21. juna Dana općine Srebrenik upriličena je svečanost na kojoj je navedena ulica zvanično otvorena. Predsjednik MZ Srebrenik I Jašarević Nermin je upoznao prisutne da su krajem septembra 2008. g., radnici firme «Road-ing» d.o.o. Gračanica, mjerenjima trase, započeli radove na rekonstrukciji ulice Tuzlanskog odreda u dužini od oko 500m, od tržnog centra Bingo do raskrsnice za Kiseljak, u gradskom području Srebrenika. Vrijednost navedenih radova, a urađeni su zemljani radovi, izvršena je odvodnja površinskih voda, kanalizacija, urađeni trotoari i potporni zidovi te novo asfaltiranje, je oko 577.000 KM, a obzirom da je u pitanju zona gradskog građevinskog zemljišta, kompletni radovi su finansirani iz sredstava rente iz budžeta općine Srebrenik. U znak zahvalnosti za doprinos realizaciji ovog krupnog infrastrukturnog projekta Jašarević je dodijelio zahvalnice općinskom načelniku



Sa ceremonije otvorenja ulice Tuzlanskog odreda

Osmanu Suljagiću i predstavniku firme «Road-ing» d.o.o. Gračanica. Prisutnima se obratio načelnik Suljagić, koji je izjavio: -Do kraja 2009. g. trebalo bi se pristupiti i rekonstrukciji raskrsnice sa mag. putem kod tržnog centra «Bingo», naravno ukoliko se u međuvremenu riješe imovinski odnosi sa vlasnicima zemljišta, a nakon toga i raskrsnica za Kiseljak. Završetkom ovih radova, kao nužnost, nameće se nastavak istih ulicom pored zgrade Općinskog suda, sadašnje zgrade Općine Srebrenik, Poljostroja do ras-

krsnice u Čehajama, čime bi Srebrenik dobio kvalitetnu zaobilaznicu odn. još jednu kvalitetnu saobraćajnicu. Nakon što su na svečan način načelnik Osman Suljagić, predsjedavajući OV-a Srebrenik Ibrahim Zukić i predsjednik MZ Srebrenik I Nermin Jašarević zajednički presjekli vrpce, na taj način zvanično otvorivši ovu ulicu, uslijedilo je prigodno druženje i narodno veselje, za šta su se pobrinuli i članovi KUD-a „Mehmed Ibrahimović“ Srebrenik.

Proširen zanatsko-tržni centar u Srebreniku

Postavljanjem aluminijskih fasada realizirana je prva faza projekta proširenja i dogradnje zanatsko-tržnog centra u ulici Alije Izetbegovića u centru Srebrenika. Na osnovu idejnog rješenja, koje je usvojilo Općinsko vijeće Srebrenik, nakon demontiranja starog krova i rušenja pojedinih pregradnih zidova, vlasnici poslovnih prostora proširili su svoje objekte za dva metra prema šetalištu i nadzidali po jedan sprat. U realizaciju prve faze ovog projekta uloženo je oko 350.000 KM, a sredstva su osigurali vlasnici dograđenih poslovnih objekata.



Savremeni ZTC u centru Srebrenika

Svečanom sjednicom OV-a obilježen 21. jun, Dan općine Srebrenik

Polaganjem cvijeća na spomen-obilježja poginulim borcima i svečanom proširenom sjednicom Općinskog vijeća, na prigodan način, obilježen je 21. jun, Dan općine Srebrenik. Pored vijećnika i



Nastup mališana iz obdaništa

predstavnik vjerskog, kulturnog i političkog života općine, sjednici su prisustvovali i Josip Juras, konzul Republike Hrvatske u Tuzli, Mladen Karlić, gradonačelnik Vinkovaca s kojima općina Srebrenik ostvaruje uspješnu prekograničnu saradnju, predsjednik Skupštine TK-a Amir Fazlić, te predstavnici Vlade i

Plaketu općine Srebrenik dobili su:

- Osman Suljagić,
- dr. Zihher Suljić,
- prof. dr. Edin Mutapčić i
- "TIM INVEST" d.o.o.Srebrenik

infrastrukture između dva općinska praznika. Nakon njegovog govora prikazan je 10. minutni film o infrastrukturnim projektima realizovanim u općini Srebrenik između

Povelju općine Srebrenik dobili su:

- Hazim Muratović (Srebrenik),
- Kristijan Smiljanić (Tinja),
- JU za predškolski odgoj i obrazovanje (Srebrenik),
- FK "Bukovik" (G. Srebrenik) i
- Mato Jurić (Špionica)

dvije proslave Dana općine Srebrenik. Nastavak regulacije korita rijeke Tinje, Pješačka zona, Ulica Tuzlanskog odreda, ulica kroz

cima i kolektivima uručena su i najviša općinska priznanja i nagrade.



Sa svečane sjednice OV-a Srebrenik

Zahvalnice općine Srebrenik dobili su Jusić Nihad iz Behrama, Hasanović Mirsad iz Čekanića, Salkić Avdija iz Falešića, Nuhanović Dževad iz Srebrenika, Delić Mursel iz Urože, Ibrić Senaid iz Špionice, Salkić Sakib iz Dubokog Potoka te KUD „Mladost“ iz Tinje, dok su novčane nagrade dodijeljene Omerović Admiru iz Srebrenika, Smajlović Maliku iz Srebrenika, Karić Fikreti iz Srebrenika, Hasanbegović Melisi iz Gornjih



Neki od dobitnika općinskih priznanja i nagrada

susjednih općina. Nakon što je podsjetio na ratne događaje u Srebreniku iz juna 1992. godine, kada su pripadnici Armije RBiH za svega tri dana oslobodili cijeli prostor ove općine, načelnik općine Osman Suljagić osvrnuo se i na rezultate na planu razvoja

naselje Neum, asfaltiranje brojnih lokalnih puteva, izgradnja novih vodovodnih i kanalizacionih instalacija, javne rasvjete, sportski poligoni ... su projekti u koje je u ovom periodu uloženo preko 6 miliona KM. Za izuzetan doprinos u razvoju općine zaslužnim pojedin-

Moranjaka, Sejdinović Melindi iz Dedića, Šehrić Edini iz Srebrenika i Hodžić Irmu iz Srebrenika. Osim navedenih Zahvalnicu Općinskog načelnika su dobili: Kovač Halid iz Srebrenika – za izuzetan doprinos u planiranju razvoja općine Srebrenik,



Sa obraćanja općinskog načelnika

Područna ambulanta Tinja-za doprinos u razvoju porodične medicine na mjesnom području Tinja, Karate klub „1. mart“ Srebrenik-za izuzetno postignute rezultate iz oblasti sporta na području općine Srebrenik, Jašarević Suad iz Srebrenika-za izuzetan doprinos u razvoju sporta na području općine Srebrenik, Ibrahimović Senad iz NN Kiseljak – za izuzetan doprinos u razvoju Mjesne zajednice Kiseljak, Karić Edin iz Rapatnice-za izuzetan doprinos u očuvanju i unapređenju stanja bezbjednosti na području općine Srebrenik, Mujkić Fikret iz Ježinca- za izuzetan doprinos u razvoju kulture na području općine Srebrenik, Bjelić Jasmin iz Srebrenika –za izuzetan doprinos na projekatima infrastrukture i katastra podzemnih instalacija na području općine Srebrenik, Emkić Sakib iz Srebrenika –za izuzetan doprinos u planiranju i realizaciji investicionih projekata općine Srebrenik te Malkić Alaga iz MZ Lisovića - za izuzetan doprinos u razvoju Mjesne zajednice Lisovići.

Otvorena spomen-obilježja u Dubokom Potoku i Ljenobudu

U okviru obilježavanja Dana općine Srebrenik, dana 19.06.2009.godine u naseljima Duboki Potok i Ljenobud, svečano su otvorena spomen-obilježja šehidima i poginulim borcima, koji su dali svoje živote



Sa otvorenja spomen-obilježja u D. Potoku

za odbranu BiH. Po dosta toplom i sparnom vremenu, očevi, majke, djeca, rodbina, komšije i prijatelji došli su da uveličaju ovaj događaj, koji je u jednom momentu i tuga i radost. Tuga, jer se otvara spomen onima kojih više nema među nama, te radost, zato što su mještani uspjeli da dostojno obilježe mjesto koje će nas vječno prisjećati na one koji su zaslužni što danas ponosno i uzdignute glave koračamo Bosnom i Hercegovinom. Uz učenje Kur'ana i monologom Fatime Džaferović, akademske glumice i predstavnice Općinskog vijeća Srebrenik, započela je ceremonija, na kojoj se pojavilo blizu 200 posjetilaca, te isti toliki broj i u Ljenobudu. Poseban štih ovoj ceremoniji dali su polaznici mektske škole, koji su učenjem ilahija i kasida te recitacijama pokazali šta su naučili. Spomenik u D. Po-



Sa otvorenja spomen-obilježja u D. Potoku

toku, koji će trajno podsjećati na 48 šehida, otkrili su općinski načelnik Osman Suljagić, predsjedavajući OV-a Srebrenik Ibrahim Zukić, vijećnik OV-a Mirza Ibrišimović, predstavnik šehidskih porodica Džemo Mujkić i predsjednik Građevinskog odbora Mustafa Omerović. Kako je istakao Nedret Zahirović, pred-



Sa otvorenja spomen-obilježja i parka u Ljenobudu

sjednik MZ Duboki Potok, u izgradnju spomen-obilježja uloženo je 40.000 KM. Najveći dio sredstava izdvojila je općina Srebrenik, a pomoć su pružili i Ministarstvo za boračka pitanja TK-a, mještani i brojni donatori. Otvaranju spomen-obilježja prisustvovao je i ministar za rad i socijalnu politiku u Vladi TK, Faruk Vikalo te predstavnik u Parlamentu FBiH, Hazim Bašić.

Položen kamen-temeljac za poslovno-prodajni centar



Kamen temeljac poslovnoprodajnog centra su položili Srećko Prijatelj i Osman Suljagić

U sklopu obilježavanja Dana općine Srebrenik, u nekadašnjem krugu fabrike namještaja „Sinex“, a danas u vlasništvu d.o.o. Marković, položen je kamen-temeljac za izgradnju poslovno-prodajnog kompleksa „Marković“, koji bi se, prema riječima direktora firme Marijana Markovića, trebao sagraditi do kraja ove godine! Poslovno-prodajni centar imao bi 4.500 metara kvadratnih i trebao bi koštati oko 7 miliona KM. Sastojao bi se od četiri dijela i bio bi sagrađen od najsavremenijih materijala, koji se koriste za izgradnju ovakvih prodajnih centara. Prvi i najveći dio ovog poslovno-prodajnog centra veličine blizu 3.000 metara kvadratnih, zauzeo bi trgovački centar „Interex“, što bi trebao biti veliki pomak u razvoju trgovine na našem općinskom području. U ovome centru posao bi trebalo dobiti najmanje 50 radnika. Nakon uvodnih riječi Marijana Markovića, direktora d.o.o. „Marković“, prisutnima sa obratio i Sebastijan Mosiju, direktor „Interexa“ za BiH, koji je kazao da se kao „Francuz osjeća lijepo u Srebreniku, te vjeruje kako će oni naći svoje mjesto kod kupaca i na ovome prostoru. Riječ je o firmi koja je u BiH stigla prije deset godina, te da bi ovo trebao biti 26-ti prodajni centar u BiH“. Potom su se gostima obratili još Srećko Prijatelj, inače poslanik u Pralamentu R. Slovenije i dugogodišnji prijatelj vlasnika firme d.o.o. Marković, ministar za rad i socijalnu politiku u Vladi TK Faruk Vikalo, koji je sugerisao vlasnicima Interexa da što više prodaju i domaće proizvode, direktno pomažući na taj način i domaću proizvodnju, te načelnik Općine Srebrenik, Osman Suljagić koji je najavio da bi se osim u prodajne, uskoro mogle očekivati i investicije u proizvodnju, posebno ako se otvori nova poslovna zona. Obzirom na recesiju, krizu kroz koju prolaze veliki tržišni centri te da do momenta izlaska Biltene (sredina oktobra 2009) nije ni započeta izgradnja prodajnog centra, vrijeme će pokazati da li će se uopće i realizovati ova investicija.

Dani otvorenih vrata firme „Herceg“ d.o.o. Srebrenik

Dana 09.10.2009.g. u d.o.o. „Herceg“ Srebrenik održana je manifestacija „Dani otvorenih vrata“, na kojoj su arhitektima, predstavnicima građevinskih firmi i ostalim potencijalnim kupcima predstavljene nove tehnologije u proizvodnji PVC prozora i vrata. Riječ je o najsavremenijoj mašini za rezanje vodenim mlazom svih vrsta materijala do debljine od 20 centimetara, američkog proizvođača «Flow», koja predstavlja apsolutnu novinu na bh. tržištu. Gostima manifestacije predstavljen je i, za sada u BiH, jedinstven način freziranja i varenja PVC profila u proizvodnji prozora i vrata. „Nabavkom novih tehnologija i proširenjem asortimana naših proizvoda pokušavamo održati korak s najprestižnijim evropskim proizvođačima PVC prozora i vrata. Novonabavljene mašine omogućit će nam i povećanje produktivnosti i podizanje kvaliteta prozora, vrata i ostalih proizvoda iz našeg proizvodnog programa, čime stvaramo



Ramiz Karić uz mašinu za rezanje vodenim mlazom preduslove za dalje povećanje izvoza na zahtjevno evropsko tržište“, istakao je direktor ove firme Ramiz Karić. „Herceg“ Srebrenik oko 60 posto svojih proizvoda plasira na tržište Slovenije, Austrije, Belgije, Švicarske, Luksemburga i Holandije, a nabavkom novih mašina, u koje je uloženo oko 500.000 KM vlastitih sredstava, prema riječima Karića, stvorene su realne pretpostavke da se u ovoj godini realizira ambiciozan plan izvoza u vrijednosti od oko 12 miliona KM i ukupan prihod od oko 22 miliona KM. U ovoj godini firma „Herceg“ je ostvarila pravo i na «CE» znak, certifikat bez kojeg se od 01.02.2010. g. proizvodi iz oblasti građevinarstva neće moći plasirati na tržište EU. Zahvaljujući višegodišnjoj orijentaciji da se kompletna dobit reinvestira u nabavku novih tehnologija, svjetska ekonomska kriza nije imala većeg negativnog uticaja na poslovanje ove firme, o čemu svjedoči i podatak o 218 zaposlenih radnika, od kojih je njih 13 s VSS. Nakon prezentacije novih tehnologija potencijalnim kupcima, narednog dana su u okviru „Dana otvorenih vrata“ iste predstavljene i svim zainteresiranim građanima.

Održani „Dani saza i sevdaha 2009“ i večer Alternativnog tetra

U organizaciji BZK „Preporod“ Srebrenik, dana 19.06.2009.godine, u sklopu aktivnosti obilježavanja 21. juna, Dana općine Srebrenik, održana je druga po redu kulturna manifestacija „Dani saza i sevdaha-Srebrenik 2009“. U prelijepom ambijentu ispred gradske fontane, pred oko pedesetak gledalaca, nastupile su sazlije: Murat Vrabac iz Tuzle-



Nastup Hogić Ahmeta iz Srebrenika

prvoplasirani sa „Festivala sevdalinke uz saz-Lukavac 2009“, Jusuf Brkić iz Gradačca- drugoplasirani sa istog Festivala i najmlađi učesnik (17 godina), Ahmet Hogić iz Srebrenika- trećeplasirani sa istog Festivala, čuvene sazlije dr. Hašim Muharemović iz Srebrenika i Rajko Simeunović iz Tuzle te nekoliko sazlija iz Srebrenika, članova grupe sazlija pri srebreničkom Preporodu.



Nastup folklora Alternativnog tetra Srebrenik

Paralelno je prikazivan kulturno umjetnički program „Alternativnog teatra“ iz Srebrenika, nekih 80 metara dalje, na Trgu Alije Izetbegovića, koji je privukao znatno veći broj gledalaca. Inače osim ovog, po nama, nepotrebnog dupliciranja kvalitetnih kulturnih sadržaja, manifestacija „Dani saza i sevdaha Srebrenik“ je dobro prihvaćena od strane učesnika i publike, tako da organizator najavljuje da će se isti održati i naredne godine te preći u tradiciju, posebno ako se uzme u obzir ugroženost sevdalinke i saza, našeg vrijednog blaga.

Promovisan roman „Farukov cvijet“, Jasminke Ibrahimović

U organizaciji Muslimanskog dobrotvornog društva „Merhamet“ i Centra za kulturu i informisanje

Srebrenik, sredinom avgusta 2009.g., u Plavoj sali srebreničkog Doma kulture, održana je promocija romana «Farukov cvijet», autorice Jasminke Ibrahimović. Riječ je o prvom romanu o silovanoj Bošnjakinji, koja je kao i više od 20.000 Bošnjakinja, ponižena brutalnim silovanjem u toku agresije na našu zemlju. –«Ovo je autentična priča o Lejli koja je jedna od hiljade silovanih Bošnjakinja. U njenoj priči žive sve



S promocije romana „Farukov cvijet“

druge slične priče, a njena bi priča trebala da živi u svim preživjelim Bošnjacima. Samo tako bošnjačka budućnost može upoznati iskustvo bošnjačke žrtve i učiti se na njemu, kako se više nikada ni jednoj bošnjačkoj djevojčici ne bi dogodilo da izraste u silovanu Bošnjakinju», rečeno je na promociji.

Promovisana knjiga „Dosije Pataren“ Osmana Arnautovića

U srednjovjekovnoj tvrđavi Srebrenik, u sklopu aktivnosti obilježavanja 21. juna, Dana općine Srebrenik, dana 19.06.2009 u 18 sati pred oko 40 posjetilaca, promovisana je knjiga „Dosije Pataren“ Osmana Arnautovića, pisca i prevodioca iz Bijeljine, koji trenutno živi i radi u Briselu kao sudski prevodilac. Ovaj historijski roman prati događaje u BiH u posljednjih 800 godina. Radnja romana se odvija na



Sa promocije knjige "Dosije Pataren"

autentičnoj historijskoj podlozi i oslikava našu daleku prošlost kroz događaje koji su nas obilježili. U romanu su iznešeni i mnogi historijski momenti dosada nepoznati našoj javnosti i isti su promovirali Emir Musli, novinar Avaza te profesori Hidajeta Arapčić, Hazim Hodžić i Zijah Selimović. Novi rukopis je inače peti roman Osmana Arnautovića, koji je rođen u Bijeljini, 16. maja 1948.godine.

Otvorena izložba slika iz fundusa Galerije OGUS-a

Dana 21.08.2009. godine, u holu Doma kulture u Srebreniku, otvorena je izložba slika iz fundusa Galerije tradicionalne kulturne manifestacije «Otvoreni



Izložene su 32 slike 13 likovnih umjetnika iz regiona grad umjetnosti» u Srebreniku. Predstavljene su 32 slike 13 likovnih umjetnika iz BiH, Srbije, Makedonije, Crne Gore, Hrvatske i Slovenije koji su, u avgustu prošle godine, desetak dana bili gosti likovne kolonije OGUS-a, jedne od najstarijih kulturnih manifestacija na području Tuzlanskog kantona. Riječ je o uljima i akrilima na platnu, te slikama rađenim kombiniranim tehnikama na kojima dominiraju motivi Starog grada, kulturne baštine i prirodnih ljepota Srebrenika. Otvaranje izložbe, po već ustaljenom običaju, predstavilo je uvertiru u ovogodišnju kulturnu manifestaciju «Otvoreni grad umjetnosti Srebrenik 2009».

Započela kulturna manifestacija „OGUS 2009“

U subotu 22.08.2009.godine, svečanim otvorenjem je započela sedmodnevna kulturna



Osman Suljagić: OGUS je regionalni kulturni događaj

manifestacija „Srebrenik-otvoreni grad umjetnosti“ (OGUS). Ova manifestacija održava se svake godine od 1977. godine, tako da je ovo sada 32. OGUS po redu.



Detalj sa svečanog otvaranja OGUS-a 2009

Na obroncima Starog grada Srebrenika iz 1333. godine, pred oko stotinu posjetilaca, ovu svečanost je otvorio načelnik Općine Srebrenik Osman Suljagić, koji je ovom prilikom kazao: -OGUS je postao ne samo



Sa nastupa zurlaša

općinski i kantonalni, nego državni i regionalni kulturni događaj, na što smo mi ovdje u Srebreniku posebno ponosni. Bez obzira na recesiju i teško stanje u ekonomiji, mi ćemo se i ove godine potruditi da napravimo značajan kulturni događaj bogat raznovrsnim sadržajima koji bi trebali da privuku veliki broj gostiju. Poslije pozdravnih riječi prvog čovjeka Srebrenika, upriličen je muzičko-scenski program u režiji Milenka Iliktarevića i scenariste Sadila Mehmedovića pod nazivom „Pod krovom Starog grada“. U programu su još učestvovali Remira Osmanović, Fatima Džaferović, Majda Mehmedović, Siniša Kahvić, Ademir Hogić, Elvis Jahić, Nedim Malkočević, dr.Hašim Muharemović, Faruk Smajlović, Suad Hogić, članovi kulturno-umjetničkog društva „Mehmed Ibrahimović“, plesna grupa „Art“ kao i nezaobilazni zurlaši.

Održane manifestacije „Veče duhovne muzike“, „Djeca slikaju svom gradu“ i „Djeca pjevaju hitove“

U okviru manifestacije „OGUS 2009“, dana 23.08.2009.godine, na trgu Alije Izetbegovića u centru



Sa nastupa grupe „ETNO ART“ iz Gračanice

Srebrenika održano je zanimljivo muzičko veče duhovne muzike uz nastup ansambla „ETNO ART“ iz Gračanice, koji su se predstavili obradom tradicionalnih sevdalinki, dok su narednog dana na istom mjestu održane dvije zanimljive manifestacije. Na prvoj, pod nazivom «Djeca slikaju svom gradu», učestvovalo je oko 200 djece predškolskog uzrasta i učenika nižih razreda osnovne škole koji su na rolni papira, dugačkoj



Sa manifestacije "Djeca slikaju svom gradu"

Oko 100 metara, crtajući prema raznovrsnim motivima, pokušala pokazati svoje likovno umijeće. —«Cilj nam je da putem likovnog izražavanja u djeci probudimo



Sa manifestacije "Djeca pjevaju hitove"

ljubav prema svom gradu, okolini i ljudima, ali i da na jedan originalan način omogućimo mališanima da se

druže. Uz to, ova manifestacija predstavlja odličnu priliku da se napravi selekcija i da se vidi koji od brojnih mališana ima posebne sklonosti prema likovnom izražavanju», ističe prof. Nedžad Bešić, član Organizacionog odbora OGUS-a. Svim mališanima uručeni su prigodni pokloni, a rolna papira s crtežima bit će pohranjena u Galeriji tradicionalne kulturne manifestacije «Srebrenik, otvoreni grad umjetnosti». U sklopu OGUS-a 2009, istog dana, u organizaciji Centra za kulturu i informisanje i KUD-a «Mehmed Ibrahimović» Srebrenik, na otvorenoj pozornici u centru grada, održan je tradicionalni festival pod nazivom «Djeca pjevaju hitove». Velikom broju posjetilaca odličnom intepretacijom sevdalinki predstavili su se Azra Barjaktarević, Omer Memić, Jasmina Musić, Armin Hogić, Enida Šiljić, Lejla Omerović, Novalija Husejnović, Azra Ordagić, Azem Šerifović i Lejla Zahirović. Ovaj tradicionalni festival, koji se organizuje s ciljem njegovanja i očuvanja sevdalinke i bosanske narodne pjesme, nije imao takmičarski karakter, tako da su svim učesnicima dodijeljeni prigodni pokloni.

Jasmin Hasić pobjednik festivala narodne muzike „Zvuci starog grada“ u Srebreniku

U okviru kulturne manifestacije „OGUS 2009“, dana 25.08.2009.godine, na Trgu Alije Izetbegovića u Srebreniku, pred 4.000 posjetilaca, održan je festival narodne muzike pod nazivom „Zvuci Starog grada“, na kojem je pobijedio Jasmin Hasić iz Srebrenika. Tročlani žiri sastavljen od renomiranih i poznatih imena u sastavu Muhamed Mujkanović, Asim



Pobjednici festivala u Srebreniku

Brkan i Džavid Pamuković, odlučio je da drugoplasiranom proglasi Azru Husarkić iz Tuzle a treću Adelu Turkić iz Živinica. Na festivalu je učestvovalo ukupno 12 izvođača iz cijele BiH, koje je pratio izvrsni orkestar „Rio-bend“ sa poznatim harmonikašima Hamdijom i Zlatanom, a da sve protekne u najboljem redu, pobrinuo se „Musik-VIK“ na čelu sa Vehbijom Ibrahimovićem-Kigenom, koji se još jednom pokazao odličnim organizatorom ovakvih muzičkih događaja.

Održan rok koncert

Dana 26.08.2009.godine, na otvorenoj pozornici na trgu Alije Izetbegovića u Srebreniku, održan je



Sa ranijeg nastupa grupe „GBK“ u Srebrenici

rok koncert uz nastup naših grupa: Mamograf i Generacija bez kompasa (GBK). Nedim Zukić, vokal „Mamografa“ i Malik Smajlović, vokal „GBK“, praćeni izvrsnim domaćim instrumentalistima, pružili su brojnim posjetiocima oko dva i po sata užitka u slušanju obrada stranih rok klasika te njihovih pjesama.

Održana promocija tri publikacije

Dana 27.08.2009.godine, na otvorenoj pozornici na trgu Alije Izetbegovića u Srebreniku, održana je promocija tri publikacije, kojoj je prisustvovao neuobičajeno velik broj ljubitelja pisane riječi. Riječ je



S promocije tri publikacije

o knjigama «Historija Bosne i Hercegovine», autora prof. dr. Azema Kožara i «Neizvjesnost u slobodi» dr. Edhema Muftića, te časopisa «Biljeg Srebrenika». U knjizi «Historija BiH», prema riječima jednog od promotora dr. Edina Mutapčića, na 263 strane autor je obradio kompletnu historiju BiH, od prvog naseljavanja ovih prostora, preko srednjeg vijeka, osmanlijskog i austro-ugarskog perioda, do posljednjeg rata u BiH i potpisivanja Dejtonskog sporazuma. –Onaj koji ne poznaje svoju prošlost, stranac je u vlastitoj domovini– rečeno je na promociji knjige «Historija Bosne i Hercegovine». Knjiga «Neizvjesnot u slobodi» sadrži brojne studije i članke, te recenzije i promocije knjiga univerzitetskih profesora, književnika i novinara, u kojima su obrađeni fašizam i antifašizam, dekonstruisanje nacionalizma u BiH, tranzicijski procesi i obrazovna politika u BiH. U časopisu «Biljeg Srebreni-

ka» obrađeno je desetak tema iz bogate kulturne historije Srebrenika, te predstavljeni najznačajniji kulturni događaji u Srebreniku u protekloj godini.

Održane završne manifestacije ovogodišnjeg OGUS-a

U okviru «OGUS»-a, dana 28.08.2009.g., na trgu Alije Izetbegovića u Srebreniku, održana je manifestacija pod nazivom «Vinkovačko veče». Na otvorenoj pozornici u centru grada predstavili su se članovi Kulturno-umjetničkog društva «Lisinski» iz Vinkovaca, a velik broj okupljenih građana imao je rijetku priliku da uživa u «zvucima ravnice». Uz vokalne soliste i tamburaše, posebnu atrakciju predstavljao je nastup članova folklorne sekcije KUD-a



Sa nastupa tamburaša

«Lisinski» koji su u živopisnim narodnim nošnjama izveli splet igara iz Slavonije. Ovoj manifestaciji prisustvovali su i načelnici Vinkovaca i Srebrenika sa svojim saradnicima, Mladen Karlič i Osman Suljagić. – «Srebrenik i Vinkovci su još prije nekoliko mjeseci uspostavili raznovrsne oblike prekogranične saradnje, a ova manifestacija predstavlja samo nastavak te saradnje. Saradnja na kulturnom planu trebala bi doprinijeti i što kvalitetnijoj saradnji u oblasti privrede», istakli su u svojim obraćanjima okupljenim građanima načelnici Karlič i Suljagić. U okviru prekogranične saradnje dva grada, već za desetak dana predstavnici općinskih vlasti i kulturnih institucija i društava iz Srebrenika bit će gosti tradicionalne kulturne manifestacije «Vinkovačke jeseni» u Vinkovcima. U subotu 29. avgusta, u 20,15



sati održana je smotra folkloru gdje su, uz domaći KUD, nastupili KUD-ovi iz Jablanice, Brčkog DC, Odžaka, Prokosovića, Cazina, te gosti iz Kranja, R. Slovenija. Ovogodišnji OGUS 2009 je zatvoren 30. avgusta u 20,15 sati multimedijalnim programom u izvođenju „Umjetničke radionice Srebrenik“.

Ramazanski bajram u Srebreniku

Centralna manifestacija obilježavanja Ramazanskog bajrama održana je u Gradskoj džamiji u Srebreniku, gdje je klanjanju bajram namaza prisustvovalo nekoliko stotina vjernika. Na isti način je, u svečanoj atmosferi,



Prijem u Medžlisi IZ Srebrenik

klanjan bajram namaz i u ostalih četrdesetak džemata Medžlisa IZ Srebrenik, nakon čega je upriličen tradicionalni obilazak roditelja, rodbine i komšija. Obilježavanje Dana šehida na drugi dan Bajrama, na području općine Srebrenik, započelo je posjetom prvih ljudi izvršne i zakonodavne vlasti Medžlisi Islamske zajednice. Predsjednik ove vjerske institucije Mevludin ef. Joldić, kazao je načelniku Osmanu Suljagiću i predsjedavajućem OV-a Ibrahimu Zukiću, kako je njihova bajramska radost pomućena jer su ovaj blagdan nakon dugo godina dočekali bez glavnog imama Ismeta ef. Mustajbašića, koji je nedavno izgubio tešku bitku za život. Potom je upriličeno polaganje cvijeća na



Otvorenje spomen-obilježja šehidima i pog. borcima u Muratima

Centralno spomen-obilježje šehidima i poginulim borcima u ratovima 1941-1945 te 1992-1995. godina, dok je centralna svečanost upriličena u Muratima, gdje je otkriveno




Hor Medžlisa IZ Srebrenik

spomen-obilježje šehidima i poginulim borcima. Izuzev prvih ljudi Općine, ovoj svečanosti prisustvovali su još ministar za socijalnu politiku i rad u Vladi TK, Faruk Vikalo, predstavnik Federalnog parlamenta Hazim Bašić, izaslanik Muftijstva tuzlanskog Bekim ef. Šabić kao i mnogobrojni gosti. Predsjednik građevinskog odbora Jusuf ef. Mehuljić, kazao je kako je u ovo spomen-obilježje investirano više od 30.000 KM, gdje je više od 50% investirano iz budžeta Općine, dok je načelnik Suljagić istakao kako se sinovi Bosne, koji su dali svoje živote nikada ne smiju zaboraviti jer su nas oni time obavezali davanjem svojih života za odbranu BiH. Trećeg dana ramazanskog Bajrama na Trgu Alije Izetbegovića održana je „Bajramska akademija“. U organizaciji Medžlisa IZ Srebrenik i Bošnjačke zajednice kulture „Preporod“, pred više od 500 posjetilaca, uz vjerski te kulturno-zabavni program, po prvi puta je na otvorenom održana ova manifestacija. Početak „Bajramske akademije“ započeo je uvodnim riječima sekretara BZK „Preporod“, Ešrefa Berbića, nakon čega su proučene ašare i ilahije u izvedbi muškog i ženskog hora Medžlisa IZ Srebrenik, te monolog Fatime Džaferović pod nazivom „Propovijed pred smrt“. Zatim je uslijedio kulturno-zabavni program gdje se publici predstavio prvo sazlija Ahmet Hogić, zatim izvođači sevdalinki Jasmin Hasić, Azra Husarkić te Vahida Halilović, dok je ovogodišnja „Bajramska akademija“ okončana nastupom folklora kulturno umjetničkog društva „Mehmed Ibrahimović“ uz pratnju orkestra „Rio-bend“.

U džematu Kuge otvorena džamija

Dana 20.06.2009.godine u džematu Kuge izvršeno je svečano otvorenje džamije. Džematlije ovog džemata su novi objekat džamije započeli na temeljima stare džamije još davne 1998.godine, kada su, 02. juna te godine, zakopali temelje ovog novog i nadasve modernog objekta. Pred hiljadama vjernika iz cijele BiH na svečanom otvorenju ovog objekta bili su prisutni i najviši općinski zvaničnici: Osman Suljagić, općinski načelnik i Ibrahim dr. Zukić, predsjedavajući OV-a Srebrenik. Ispred Rijaseta IVZ Sarajevo otvorenju džamije prisustvovao je izaslanik Reisa Mustafe ef. Cerića, Mirsad ef. Mahmutović, a ispred muftijstva TK-a Bekir ef. Šabić, te ispred medžlisa IZ Srebrenik Mevludin ef. Joldić.



Nova džamija u Kugama

Ceremoniju svečanog otvorenja vodio je imam džemata Kuge Mustafa ef. Kavgić, a uvodni referat je pročitao predsjednik građevinskog odbora za izgradnju džamije hadži Šaban Mehmedović, koji je istakao da je za izgradnju ovog objekta utrošeno oko 299.000 KM, od čega su 45.000 KM donirali općina Srebrenik, Medžlis IZ Srebrenik, dijaspora i drugi džemati, a ostatak od 254.000 KM su obezbijedili mještani ovog i džemata Bjelave, koji su se od džemata Kuge odvojili prošle godine. Džamiju je svečano otvorio gospodin Nuriya Bećirović iz Kuga, koji je na licitaciji za otvorenje džamije ponudio najviši iznos od 11.000 KM.

Bojani Stojanović i Selmi Mujkić prve nagrade za likovni rad



Zajednička fotografija nagrađenih

Ministarstvo kulture i sporta FBiH je u aprilu mjesecu 2009. godine, u sklopu programa „Mladi i naslijeđe 2009“ u okviru manifestacije „Dani evropskog naslijeđa“, raspisalo Konkurs za dostavljanje likovnih radova učenika osnovnih i srednjih škola. Tema konkursa je „Običaji iz mog kraja“ a sve je pokrenuto s ciljem da podstakne mlade na očuvanje, brigu i ljubav za kulturno-historijsko naslijeđe Bosne i Hercegovine. Na konkurs su se prijavile i naše dvije

škole i to: MSS Srebrenik sa radom Bojane Stojanović, učenice III razreda, čiji je mentor Nedžad Bešić, profesor likovne kulture, i Prva osnovna škola Srebrenik sa radom Selme Mujkić, učenice VIII razreda, čiji je mentor Ismeta Buljubašić, nastavnik likovne kulture, koje su, u veoma jakoj konkurenciji preko 60 škola iz svih krajeva FBiH, uspjele osvojiti prve nagrade u svojim kategorijama. Ovo je još jedna u nizu vrijednih nagrada koje su ovi vrsni likovni pedagozi i njihovi

talentirani učenici osvojili, a za nagradu su boravili 25. i 26. septembra u Sarajevu, na centralnoj manifestaciji „Dani evropskog naslijeđa“, na kojoj su dodijeljene nagrade najuspješnijim pojedincima i škola-

ma, postavljena izložba učeničkih radova te održano niz drugih manifestacija kojima je predstavljena



Bojanin rad

bogata nematerijalna kulturna baština BiH kao što su: jezik, igre, pjesme, stari zanati, muzika, šara,



Selmin rad

gastro-nomija, običaji kao i ostale tradicionalne narodne vrijednosti. Nagrađenim učeni-

cama kao i njihovim mentorima čestitamo sa željom da i ubuduće, na raznim takmičenjima, sa uspjehom predstavljaju svoju školu i Općinu.

Srebrenik domaćin dvodnevnog sajma pčelarstva

Dana 12. i 13. 09. 2009.g. na Trgu „Alije Izetbegovića“ u Srebreniku, održan je „Sajam pčelarstva i pčelinje opreme“, koji je otvorio načelnik Osman Suljagić. Na oko 20 štandova med, propolis, vosak, sirupe na bazi meda i ostale pčelinje proizvode su izložili pčelari iz Srebrenika, Gračanice, Bihaća, Tuzle..., kao i pčelari iz Srbije. Ovo je prvi sajam pčelarstva u Srebreniku, koji bi u budućnosti trebao biti tradicionalan. Prvog dana sajma Ferid Velagić je održao predavanje „Organizovana proizvodnja matične mliječi“, a dan kasnije Živko Marković je govorio o „Tehnologijama pčelarenja na visokim prinosima“. Predsjednik udruženja pčelara „Roj“ iz Srebrenika, Pašezad Zukić je kazao: -Nakon desetogodišnjeg postojanja ovoga udruženja, koje je obnovljeno, jer se računa njegovo postojanje od 1970. godine, odlučili smo se za jedan ovakav izazov. Imamo 70 članova i želimo da osnujemo školu pčelarstva, kako bi i mladi nastavili našim stopama.



Sa sajma pčelarstva

Srebrenik dobio Gorsku službu spašavanja



Dana 24.09.2009.godine ispred Vatrogasnog doma u Srebreniku, održana je manifestacija na kojoj je predstavljena Gorska služba spašavanja Srebrenik, koja je formirana pri Planinarskom društvu "Majeвица" Srebrenik. Pored pripadnika ove službe i njihove opreme, predstavili su se ljudstvom i opremom i predstavnici Profesionalne vatrogasne jedinice Srebrenik, Službe hitne pomoći Srebrenik, Policijske stanice Srebrenik te članovi Tima za uklanjanje NUS-a KUCZ Tuzla, tj. svi oni koji u slučaju potrebe, uz koordinaciju Štaba CZ Srebrenik, mogu i moraju pomoći u zaštiti i



Gosti manifestacije

spašavanju ljudskih života i materijalnih dobara. Gorska služba spašavanja bit će neprofitna organizacija građana entuzijasta čiji je osnovni cilj pomoć i spašavanje ljudi u nepristupačnim planinskim, ali i urbanim područjima ili

objektima. -Osnovna djelatnost Gorske službe bit će pružanje pomoći ljudima u planinama, nepristupačnim predjelima, liticama, kanjonima, visokim objektima, tunelima, cijevima, saobraćajnim nesrećama, skijalištima, penjalištima, speleološkim objektima..., kazao je šef Službe civilne zaštite, Bajro Imširović. Ipak, da bi entuzijizam ovih hrabrih pripadnika Gorske službe bio stavljen u funkciju, bit će potrebno izvršiti obuku i osposobljavanje ove ekipe. Zatim bit će potrebno nabaviti i dodatnu zaštitnu opremu poput vjetrovki, zimske odjeće, šatora, užadi, planinskih čekića, dok će biti potrebna i nabavka jednog terenskog motornog vozila kako bi



Tim za uklanjanje NUS-a se osigurala njena mobilnost.

Novinari, političari, treneri, profesori...

Šestočlanu ekipu čini spoj zanimljiv zanimanja, a na čelu je Elvir Ćudić, inače profesor tjelesnog i zdravstvenog odgoja i odbojkaški trener, zatim Mirza Ćidić, diplomirani žurnalista, Mustafa Arifović, trener Karate kluba „Srebrenik“ i nosilac crnog pojasa treći dan, Nedžad Djedović, donedavni predstavnik u OV-u Srebrenik, Amir Jašarević, karatista te Almir Suljić, student Medicinskog fakulteta.



Nagrade najboljim inovatorima Srebrenika



Zajednička fotografija nagrađenih inovatora

Udruženje inovatora Srebrenik (UIS) je dana 26.09.2009.godine, u Plavoj sali Doma kulture u Srebreniku, pred četrdeset prisutnih, održalo radionicu „Podsticanje inovatorske aktivnosti“. Kako je istakao Duranović Nusret, predsjednik UIS-a, nakon nekoliko prethodno održanih radionica te posjete delegacije UIS-a sajmu inovacija u Budimpešti, ovo je završna aktivnost na kojoj su se prisutnima, prigodnim predavanjima, obratili Hujčić Husejn, generalni sekretar SIBIH-a, koji je govorio o strateškim ciljevima Saveza inovatora BiH, prof. dr. Suljkanović Midhat, koji je, kroz praktične primjere kako inovacije mogu pospješiti određene tehnološke procese, predstavio temu „Energetska efikasnost kao osnov održivog razvoja“ te mr. Mujkić Kemal, koji je kroz temu „Inovatori i privreda“ predstavio iskustva Rudnika uglja Banovići u vezi usvajanja i primjene akata oko nagrađivanja inovatora u privredi. U nastavku radionice zanimljivo

predavanje je održao prof.dr. Jašić Midhat na temu „Savremeni tendovi i inovacije u ishrani“ u kojem je istakao da inovatorstvo ne mora biti vezano samo za tehniku te domaći inovator Smajlović Abdulah na temu „Novi način odlaganja kućnog otpada“. Kako je istaknuto, sve gore navedeno, kao i dodjela diploma i novčanih nagrada, koja je uslijedila

na kraju radionice, bilo je moguće zahvaljujući novčanoj pomoći Federalnog ministarstva industrije, energetike i rudarstva. Mujčinović Nedim, sekretar UIS-a je pojasnio način vrednovanja te pročitao rang listu najboljih inovatora, kojima su ovom prilikom dodijeljene diplome te novčane nagrade u ukupnom neto iznosu od 1500 KM.

Inovatori - dobitnici novčanih nagrada i diploma

Novčanu nagradu od 100 KM i diplomu su dobili: Pedljić Nermin (učenik OŠ Rapatnica), Mujanović Ahmed (učenik OŠ Špionica), Džafić Amela (učenica Prve OŠ Srebrenik) i Jašarević Idriz (učenik Druge OŠ Srebrenik) dok su Hirkić Samra, Muharemović Sumea i Džanić Amra (učenice OŠ Tinja) podijelile nagradu od 150 KM. Nagradu od 150 KM i diplomu je dobio Sofić Safer, nastavnik TO iz Druge OŠ Srebrenik, dok je Malkić Fatima, nastavnica TO iz OŠ Tinja dobila diplomu za postignute uspjehe na polju inovatorstva. Inovator Smajlović Abdulah iz Srebrenika je pored zlatne plakete za patent „Eko kabina“ osvojio i 300 KM, Sadić Alma iz Dubokog Potoka za inovaciju „Posuda za bojenje kose“ i Karić Fahrudin iz Srebrenika za inovaciju „Proizvodnja kreča metodom direktnog i indirektnog zagrijavanja“ su nagrađeni srebrenim plaketama i novčanim iznosom od 200 KM, dok je Moranjkić Tarik iz Srebrenika za inovaciju „Uređaj za pročišćavanje i mjerenje zagađenosti zraka“ dobio 100 KM i brončanu plaketu

Kadeti OK „Gradina-Herceg“ Srebrenik drugi u državi

Nakon osvojenog regionalnog takmičenja, kadetska ekipa OK „Gradina-Herceg“ plasirala se na federalno takmičenje, koje je održano u Bihaću. Uspješnim igrama, zajedno sa ekipom „Bosne“ iz Kalesije, obezbijedili su plasman na najviši rang takmičenja, a to je završni turnir državnog odbojkaškog prvenstva za kadete. Osim gore navedenih ekipa iz FBiH, na turniru su učestvovala i dvije najbolje plasirane ekipe iz Republike Srpske, a to su „OK Modriča-Optima“ i „OK Drina“ iz Zvornika. Pobjedom nad ekipom Drine naši odbojkaši su prošli u finale državnog prvenstva. U finalnoj utakmici naši odbojkaši nisu imali dovoljno snage da savladaju



Stoje s lijeva na desno: Ibrahimović Mustafa- trener ekipe, Kešetović Erdin, Zukić Elvedin, Zahirović Kenan, Okić Minadir, Harčinović Ešref- potpredsjednik kluba. Čuče s lijeva na desno: Koprić Dino, Hasanović Semir- libero ekipe, Suljanović Armin, Harčinović Alen- kapiten ekipe

domaćina, ekipu „OK Modriča“, pa su se morali zadovoljiti drugim

mjestom, čime zaslužuje sve pohvale za ovaj veliki uspjeh.

Ekipa „Sidoila“ pobjednik Radničkih igara - Srebrenik 2009

Ekipa „Sidoila“ pobjednik je 6. Radničkih igara – Srebrenik 2009, koje su se tokom juna održavale u „Sportsko-rekreativnom centru“ Srebrenik. „Sidoil“ je u



Pobjednička ekipa Sidoila

finalnom susretu bio bolji od ekipe „Persel“ koju su savladali sa 3:0. U duelu za treće mjesto „Herceg '83“ savladao je tim „Ingrama“ sa 3:2. Za „Fair play“ ekipu proglašena je „Herceg-limarija“. Ekipa „Sidoila“ se predstavila sa vrlo jakim sastavom koje su uz kapitena Sedineta Karića činili još Ravkić, Mahmutović, Hodžić..., te su sasvim zaslužno došli do trijumfa. Na turniru je učestvovalo 16 ekipa. Po završetku finalnog susreta, načelnik Općine Srebrenik, Osman Suljagić, kao pok-

rovitelj ove sportske manifestacije, uručio je najboljima pehare, diplome i novčane nagrade.

Miodragu Saviću prvo mjesto na šahovskom turniru „Džafer Hogić“

U organizaciji Š.K. «Srebrenik», na platou ispred srebreničkog Doma kulture, dana 20.06.2009. godine, održan je Peti memorijalni međunarodni šahovski turnir «Džafer Hogić», na kojem je nastupilo rekordnih 107 šahista, među kojim je bilo 8 velemajstora, te po 7 internacionalnih i FIDE majstora. Igralo se devet kola po švicarskom sistemu s tempom igre od 14 minuta po igraču, a najuspješniji je bio velemajstor Miodrag Savić (Srbija) sa 7,5 poena, kojem je ovo drugi trijumf na ovom turniru. Od 2. do 8. mjesta plasirali su Dragiša Blagojević (Crna Gora), Milan Draško (Crna Gora), Borko Lajthajm (Srbija), Šahbaz Nurkić (BiH), Milan Vukić (BiH), Danilo Milanović (Srbija) i Vitimir Arapović (BiH), sa 7 poena. Najbolja šahistkinja je Gorica Gavrić, najbolji kadet je Srđan Jeftić, najuspješniji šahista bez rejtinga je Adis Mumanović, dok

je novčana nagrada za najboljeg veterana pripala velemajstoru Milanu Vukiću kao i najuspješnijim igračima iz Srebrenika Adisu Mumanoviću i Arifu Muharemoviću.



Velemajstor Miodrag Savić

Najbolje košarkašice KK „Jedinstvo“ Tuzla

Na turniru košarkašica koji je održan 17.06.2009.godine u „SRC“ Srebrenik, najviše su pokazale košarkašice tuzlanskog Jedinstva, koje su osvojile prvo mjesto, savladavši u finalu domaći sastav Fenixa. Treće mjesto pripalo je djevojkama Milenijuma iz Živinica, četvrtu poziciju zauzele su košarkašice Brčko-Distrikta, dok je posljednjeplasirana bila ekipa Jedinstva 2. Turnir je otvorio načelnik Općine Osman Suljagić.

DM Čifluk iz Srebrenika pobjednik turnira u Babunovićima

Dana 17.08.2009.godine, na sportskom poligonu u Babunovićima, odigran je Memorijalni turnir u malom nogometu u znak sjećanja na šehide i poginule borce iz ovog naselja. Na turniru je učestvovalo 18



Ekipa DM Čifluk

ekipa s područja općina Srebrenik i Gračanica, a prvo mjesto osvojio je «DM Čifluk» Srebrenik, na drugom mjestu su «Srebrena krila» iz Srebrenika, dok je treću poziciju izborila ekipa srebreničke mjesne zajednice Sladna. Najboljim ekipama uručene su diplome, pehari i novčane nagrade u iznosu od 250, 150 i 60 KM. Prije početka turnira, predstavnici MZ Babunovići i malonogometnih ekipa položili su cvijeće na spomen-obilježje šehidima i poginulim borcima iz ovog naselja.

Ekipa Lisovića pobjednik Četvrte ljetne lige malog nogometa

U Dubokom Potoku kod Srebrenika završena je Četvrta ljetna



Pobjednička ekipa Lisovića

liga malog nogometa, u okviru koje se tokom dvije sedmice takmičilo 12 ekipa s područja Srebreničke općine. Pobjednik ovogodišnje tradicionalne

Ljetne lige u malom nogometu je ekipa Lisovića, na drugom mjestu je Čifluk, dok je treće mjesto izborila Pekara «Magistrala». Za najboljeg igrača proglašen je Muhamed Musić iz Lisovića, dok je najbolji golman Ahmed Mujkanović iz Čifluka. Tri najbolje plasirane ekipe dobile su diplome, pehare i novčane nagrade u iznosu od 400, 300 i 150 KM.

Veteranima Čehaja memorijal Buke

U „SRC“ Srebrenik, sredinom jula 2009. održan je memorijalni turnir u čast tragično preminulog Saliha Omerovića-Buketa, čiji je pobjednik ekipa veterana Čehaje. Turnir se igrao po bod-sistemu a izuzev Čehaja učestvovali su još kafe bar „Medijum“, omiljeni objekat preminulog Saliha,



Pobjednici-ekipa veterana Čehaja zatim „Elektro-distribucija“ u kojoj je bio uposlen te ekipa „Herceg“, firme za proizvodnju plastične stolarije za koju je bio rodbinski vezan. Na turniru je nastupio i U21 reprezentativac BiH Damir Husić, donedavni član gradačačke Zvijezde i zeničkog Čelika koji karijeru nastavlja u Austriji. Salih Omerović-Buke iz Čehaja bio je proslavljeni fudbaler N.K. Gradine, a život je izgubio u saobraćajnoj nesreći prošle godine na magistralnom putu Tuzla-Orašje u Špionici kod Srebrenika.

Ekipa Ahmića pobjednik Omladinskih igara Srebrenik 2009

U organizaciji „SRC“ Srebrenik, održane su Omladinske igre MZ sa područja općine Srebrenik, gdje su u kategoriji seniora najbolji bili Ahmići, u selekciji pionira ekipa



Prvo mjesto seniuri- ekipa Ahmića Centar 1. Ekipa Ahmića je u finalnom susretu bila bolja od Lisovića na penale, dok je u regularnom toku susreta meč završen 3:3. Treće mjesto pripalo je Falešićima a četvrto Babunovićima. Najbolji strijelac turnira bio je Nihad



Prvo mjesto pioniri-ekipa Centar 1 Taletović sa postignutih 11 golova dok je za najboljeg golmana proglašen Kemal Osmić iz pobjedničke ekipe. U pionirskoj konkurenciji ekipa Centar 1 predvođena trenerom Šehalijom Šehrićem pokazala je najviše, a njihov igrač Elvedin Aletić sa 10 golova bio je najbolji strijelac, dok je za najboljeg golmana proglašen Adnan Zukić iz Podorašja. U finalnom susretu Centar 1 bio je bolji od Čehaja sa 6:1. Treće mjesto pripalo je ekipi Podorašje a četvrto je zauzela ekipa Luka. Na turniru je ukupno učestvovalo 29 ekipa iz većine MZ sa područja općine Srebrenik, a najboljim ekipama i pojedincima su uručene novčane nagrade, pehari i diplome. Na Omladinskim igrama su se predstavili i profesionalci iz Srebrenika. Tako je veznjak Željezničara Samir Bekrić nastupao na jednoj utakmici za ekipu Bare-Sidoil kao i donedavni lijevi bek Čelika Jasmin Moranjkčić. Desni bek U21 reprezentacije BiH Damir Husić zaigrao je za tim Čehaja a Adnan Mašić je doveo ekipu Babunovići do četvrtog mjesta.

Održana 4. mala seoska olimpijada

U organizaciji HKD "Napredak", dana 08.08.2009. godine, u Srednjoj Špionici kod Srebrenika, održana je Četvrta mala seoska olimpijada, na kojoj je nastupilo više od 100 takmičara.



Sa 4. male seoske olimpijade

Mališani predškolskog uzrasta i os novci bili su podijeljeni u pet kategorija. U trčanju na 100 metara prva mjesta u svojim kategorijama osvojili su: Gabriijela Gudeljević, Šimo Lučić, Adrijana Veselčić, Marko Veselčić, Izabela Tadić, Domagoj Gudeljević, Anita Jurić, Dario Josić, Katarina Jurić i Matija Jurić. U trčanju u vreći najbolji su bili: Patricija Gudeljević, Danijel Babić, Matea Veselčić, Ivan Paradžiković, Ivona Bagara, Dario Josić i Marina Mijić. U disciplini nošenje jajeta u kašici prva mjesta osvojili su: Adrijana Veselčić, Petar Gudeljević, Matea Veselčić, Doma-

goj Gudeljević, Antojina Jurić, Mustafa Omerović i Marina Kraljević. U bacanju kamena s ramena najbolji su bili: Patricija Gudeljević, Darijo Marijančević, Kristina Veselčić, Ivan Dežić, Antonija Jurić, Đulijano Marojević, Marina Mijić i Ivan Bagara. U skoku udalj prva mjesta su osvojili Franciska Veselčić, Marko Veselčić, Nikolina Knežević, Majkl Veselčić, Antonija Jurić, Matej Veselčić, Katarina Jurić i Ivan Bagara. U kategoriji hvatanje jabuke zubima, jabuku su uspjeli zagristi samo Majkl Veselčić i Mustafa Omerović. Najuspješnijim takmičarima predsjednica HKD "Napredak" Srebrenik Filka Veselčić uručila je diplome i prigodne poklone.

Manifestacija „Dani građanskih inicijativa“

U organizaciji općine Srebrenik, Udruženja građana penzionera civilnih invalida I i II kategorije iz Srebrenika, NO «Maltezer» i Udruženja grupa naučnika «Bosna» iz njemačkog grada Frankfurta, dana 01.08.2009.godine, u Srebreniku je održana manifestacija „Dani građanskih inicijativa“. Na trgu Alije Izetbegovića, putem posebnih info-štanova, predstavilo se oko 40 udruženja i grupa građana s područja naše općine. Manifestacija, koja se po prvi put održala u Srebreniku, imala je za cilj promociju djelatnosti svih udruženja i mogućnosti ostvarivanja prava građana koja nisu mogli ostvariti putem vladinog sektora, te promociju i unapređenje volonterskog rada. U okviru ove manifestacije, na ljetnoj pozornici u centru grada predstavnici naših udruženja predstavili su folklorno, horsko, dramsko i plesno stvaralaštvo, a održan je i koncert mladih srebreničkih rok grupa. Odigrane su i utakmice ženskih fudbalskih ekipa, kao i utakmica mlađih selekcija lokalnih klubova, te šahovska simultanka između FIDE majstora Hamze Mujića iz Tuzle i 20 srebreničkih šahista. Članovi Auto-kros kluba Srebrenik na auto-stazi u Babunovićima za učesnike i goste iz Srebrenika i Njemačke priredili su promotivnu auto-kros utrku.



Sa manifestacije „Žetva 2009“

U Gornjim Hrgovima je 28.06.2009. godine održana manifestacija „Žetva 2009“, kojom su organizatori željeli da prikažu kako se nekada kosila pšenica, zob i raž. U organizaciji etno-dvorišta „Marojević“ vl. Marojević Ive iz Gornjih Hrgova i obiteljsko-poljoprivrednog gospodarstva „Veselčić“ iz Srednje Špionice, pred stotinjak gostiju održana je neobična manifestacija. Također, domaćini su nastojali i da demonstriraju kako se odvajalo vršalicom zrno od slame na vršilici staroj preko 100 godina, mljela pšenica u mlinovima na vodu i pekao kruh pod pekom i na žaru. Po završetku manifestacije, domaćini su se potrudili da predstave i tradicionalno spremljena jela od pšenice.



Održana manifestacija „Dani kruha i plodova zemlje“

U organizaciji Hrvatskog kulturnog društva „Napredak“ Srebrenik, dana 10.10.2009.godine, u dvorištu područne osnovne škole u Srednjoj Špionici održana je tradicionalna manifestacija „Dani kruha i plodova zemlje“. Uz velik broj građana, manifestaciji



Sa manifestacije „Dani kruha i plodova zemlje“

koju je zvanično otvorio općinski načelnik Osman Suljagić, prisustvovali su i Faruk Vikalo, ministar za rad i socijalnu politiku u vladi TK-a, Josip Juras, generalni konzul konzulata Republike Hrvatske u Tuzli i predstavnici BZK „Preporod“ Srebrenik. „Uz izražavanje zahvalnosti prirodi na obilatim plodovima zemlje, cilj ove tradicionalne manifestacije je da se sačuvaju od zaborava narodni običaji u pripremi raznih pita, gulaša i ostalih tradicionalnih jela“, istakla je Filka Veselčić, predsjednica HKD „Napredak“ Srebrenik. Na posebnim štandovima posjetioци su imali priliku pogledati i razne vrste pekmeza, sokova i zimnice pripremljene na tradicionalni način bez upotrebe konzervansa. Predstavljene su i razne vrste jestivih tikvi, povrća i velikog broja autohtonih sorti voća proizvedenih na obiteljskim poljoprivrednim gospodarstvima uz poštivanje strogih ekoloških normi.

Vrijedna donacija namještaja Drugoj OŠ Srebrenik

Zahvaljujući našim ljudima na radu u inostranstvu i humanitarcima iz Njemačke, nedavno je Druga osnovna škola Srebrenik dobila vrijednu donaciju školskog namještaja. Riječ je o 148 kvalitetnih klupa i 353 stolice, kojima će biti opremljene učionice centralne škole za učenike od prvog do četvrtog razreda, te učionice u područnoj školi u Gornjem Srebreniku. Prema riječima Emira Hozića, direktora Druge OŠ Srebrenik, školski namještaj su donirale nevladine organizacije „Grupa naučnika Bosna“ i „Maltezer“ iz njemačkog grada Frankfurta, a vrijednost donacije procjenjuje se na 12.980 eura. Zahvaljujući ovoj donaciji, stare i prilično dotrajale stolice i klupe zamije-



Direktor Hozić Emir pored dijela donacije

njene su kvalitetnim školskim namještajem iz Njemačke, a prema riječima direktora Hozića, školski namještaj u Drugoj osnovnoj školi po prvi put je obnovljen od njenog osnivanja sada već daleke 1989. godine. Pozajmicom u iznosu od 2.000 eura, kojima je Druga osnovna škola Srebrenik morala platiti porez, carinu i transportne troškove, ovu akciju pomogla je i srebrenička firma „Gromeks“.

Održani tradicionalni motosusreti „Srebrenik 2009“

U organizaciji Moto kluba «Gradina» Srebrenik, u Srebreniku su održani tradicionalni motosusreti, na kojima je učestvovalo oko 800 motociklista iz BiH, Norveške, Njemačke, Srbije, Hrvatske i Crne Gore. U okviru trodnevnih susreta, održana su dva rok



Defile motorista ulicama Srebrenika

koncerta na kojima su nastupili «Zabranjeno pušenje» i «Generacija bez kompas», te nekoliko lokalnih rok grupa. Prema procjeni organizatora, rok koncerte na pomoćnom igralištu Gradskog stadiona u Srebreniku pratilo je oko 3.500 posjetilaca, a upriličen je i tradicionalni defile ulicama Srebrenika. Posebnu atrakciju predstavljale su moto-akrobacije koje su drugog dana susreta u, za saobraćaj privremeno zatvorenoj, ulici 21. srebreničke brigade, pred velikim brojem radoznalih posjetilaca, izvodili najhrabriji ljubitelji četverotočkaša iz BiH i inostranstva.

HUMANOST

Enver Mulahmetović uselio u novu kuću

Prvi projekat Udruženja demobilisanih boraca „UDB“ Srebrenik pod nazivom „Jedna godina, jedna kuća“, uspješno je realizovan. Šestočlanoj porodici Envera Mulahmetovića iz Donjeg Srebrenika, predstavnici ovoga udruženja, među kojima su pored predsjednika Udruženja Bajre Imširovića bili i dr. Zihir Suljić, Nermin Jašarević... uručili su ključeve



Trenutak predaje ključeva nove kuće porodici Mulahmetović

novosagrađene kuće. Predsjednik UDB-a Bajro Imširović na ovoj svečanosti je kazao: -Mi smo još zimus donijeli odluku da ćemo svake godine po jednog demobilisanog borca AR BiH useliti u kuću. Naš prvi izbor bio je Enver Mulahmetović koji je kao maloljetnik bio jedan od najhrabrijih boraca za odbranu Bosne i Hercegovine, a s obzirom na njegovu tešku materijalnu situaciju gdje živi sa majkom, suprugom i četvero djece, odlučili smo da on bude prvi u ovome projektu, rekao je



Stara kuća Mulahmetovića

Imširović. Kuća je započeta sa izgradnjom u junu ove godine, te je nakon tri mjeseca spremna za useljenje. Investirano je blizu 40.000 KM, a sredstva su obezbijeđena iz općinskog budžeta kao i od komšija, prijatelja i

privrednika... „Udruženje privrednika“ Srebrenik je također izdvojilo određena sredstva, a njihov predsjednik Mirza Ordagić je kazao: - Privrednici su uvijek spremni za ovakve konkretne akcije, kada su u pitanju oni kojima je pomoć uistinu potrebna. Enver Mulahmetović nije skrivao zadovoljstvo nakon što je konačno dobio krov nad glavom: -Hvala svim dobrim ljudima koji su se odazvali ovoj akciji. Dobiti krov nad glavom uistinu je veliko zadovoljstvo. Sada pozivam sve one koji su u mogućnosti da pomognu i ostalim mojim saborcima da dobiju kuću, govori Enver.

Porodici Jerković uskoro novi "krov nad glavom"

Ilija Jerković u špioničkom naselju Šestići sa suprugom Marom, kao demobilisani borac „108.brčanske brigade“, živi u izuzetno teškim uslovima za život. Nakon što je Ilija napustio posao u Zagrebu 1992. godine zbog ratnih dešavanja na ovim prostorima, danas praktično žive bez ikakvih primanja. - Borio sam se za ovu državu, napustio sam posao, žena mi je 80% civilni invalid. Nije nam nimalo lako u životu, jer jednostavno nemamo nikakvih primanja, priča svoju životnu priču 55-godišnji Ilija. Trošna i neuslovna kućica u kojoj dane provode Jerkovići, nema ni struje ni vode. Za vodu se i nekako snađu, jer s kanisterima pješače do obližnjih Babunovića pa se tako



Mara i Ilija Jerković

opskrbe pitkom vodom, dok je struja za njih nepoznat pojam. Njima je u ovome momentu ipak najvažniji krov nad glavom, jer ovaj u kojem sada žive, totalno je neuslovan. Nedavno su imali posjetu iz Općine Srebrenik, a delegaciju je predvodio Teufik Smajlović, referent u Službi za boračko-invalidsku zaštitu. -Općina Srebrenik će nastojati da obezbijedi početna sredstva za izgradnju kuće Jerkovića, a svakako da se očekuje i pomoć iz Brčko Distrikta, kao i iz Posavske županije. Ovom prilikom pozivam sve ljude dobre volje da pomogne ovoj porodici, kazao je Smajlović.